

四庫全書

史部

欽定四庫全書

明史卷一百六十六

大學士張廷玉等奉 敕修

列傳第五十四

韓觀

山雲

蕭授

吳亮

方瑛

陳友

李震

王信

郭都勝

彭倫

歐磐

張祐

韓觀字彥賓虹人高陽忠壯侯成子也以舍人宿衛忠謹為太祖所知授桂林右衛指揮僉事洪武十九年討平柳州融縣諸蠻累遷廣西都指揮使二十二年平富川蠻設靈亭千戶所二十五年平賓州上林蠻二十七年會湖廣兵討全州灌陽諸徭斬千四百餘人明年捕禽宜山諸縣蠻斬其偽王及萬戶以下二千八百餘人以征南左副將軍從都督楊文討龍州土官趙宗壽宗

壽伏罪移兵征南丹奉議及都康向武高勞上林思恩  
都亮諸蠻先後斬獲萬餘級觀生長兵間有勇略性驚  
悍誅罰無所假下令如山人莫敢犯初羣蠻所在蜂起  
剽郡縣殺守吏勢甚熾將士畏觀法爭死鬪觀得賊必  
處以極刑間縱一二使歸告諸蠻諸蠻膽落由是境內  
得安二十九年召還進都督同知明年復從楊文討平  
吉州及五開叛苗與顧成討平水西諸蠻堡還理左府  
事建文元年練兵德州禦燕師無功成祖即位委任如

故命往江西練軍城守兼節制廣東福建湖廣三都司  
廬陵民嘯聚山澤帝不欲用兵遣行人許子謨齎敕招  
諭命觀臨撫之觀至衆皆復業賜璽書褒勞命佩征南  
將軍印鎮廣西節制兩廣官軍帝知觀嗜殺賜璽書戒  
之曰蠻民易叛難服殺愈多愈不治卿往鎮務綏懷之  
毋專殺僂會羣蠻復叛帝遣員外郎李宗輔齎敕招之  
觀大陳兵示將發狀而遣使與宗輔俱桂林蠻復業者  
六千家惟思思蠻未附而慶遠柳潯諸蠻方殺掠吏民

乃上章請討永樂元年與指揮葛森等斬擊理定諸縣  
山賊千一百八十有奇擒其酋五十餘人斬以徇還所  
掠男女於民而撫輯其逃散者明年遣都指揮朱輝諭  
降宜山忻城諸山寨荔波徭震恐乞為編戶帝屬觀撫  
之八十餘洞皆歸附明年得桂柳三府蠻作亂已撫復  
叛遣朱輝以偏師破之蠻大懼會朝廷遣郎中徐子良  
至遂來降歸所掠人畜器械四年大發兵討安南詔觀  
畫方略轉粟二十萬石餉軍已復命偕大理卿陳洽選

土兵三萬會太平仍令觀偵安南賊中動靜尋從大兵  
發憑祥抵坡壘關以所部營闕下伐木治橋梁給軍食  
安南平命措置交趾緣途諸堡而柳潯諸蠻乘觀出復  
叛五年觀旋師抵柳州賊望風遁匿觀請俟秋涼深入  
且請濟師帝使使發湖廣廣東貴州三都司兵又敕新  
城侯張輔遣都督朱廣方政以征交趾兵協討十月諸  
軍皆集分道進剿觀自以貴州兩廣兵由柳州攻馬平  
來賓遷江賓州上林羅城融縣皆破之會兵象州復進

武宣東鄉桂林貴平永福斬首萬餘級禽萬三千餘人  
羣蠻復定捷聞帝嘉勞之九年拜征夷副將軍仍佩故  
印總兵鎮交趾明年復命轉粟給張輔軍輔再出師定  
交趾觀皆主饋運不為將故功不著觀在廣西久威震  
南中蠻人惴惴奉命繼之者自山雲外皆不能及十二  
年九月卒無子宣德二年保定伯梁銘奏求觀南京故  
宅帝許之既聞觀妻居其中曰觀功臣也雖歿豈可奪  
之遂不許令有司以他宅賜銘



山雲徐人父青以百戶從成祖起兵積功至都督僉事  
雲貌魁梧多智略初襲金吾左衛指揮使數從出塞有  
功時幼軍二十五所隸府軍前衛掌衛者不任事更命  
雲及李玉等五人撫戢之仁宗立擢行在中軍都督僉  
事宣德元年改北京行都督府命偕都御史王彰自山  
海抵居庸巡視關隘以便宜行事帝征樂安召輔鄭王  
襄王居守明年柳慶蠻韋朝烈等掠臨桂諸縣時鎮遠  
侯顧興以不救邛溫被逮公侯大臣舉雲帝亦自知之

三年正月命佩征蠻將軍印充總兵官往鎮雲至討朝  
烈破之賊保山巔山峻險掛木於藤壘石其上官軍至  
輒斷藤下木石無敢近者雲夜半束火牛羊角以金鼓  
隨其後驅向賊賊謂官軍至亟斷藤比明木石且盡衆  
譟而登遂盡破之南安廣源諸蠻悉下是夏忻城蠻譚  
團作亂雲討禽之四年春討平柳潯諸蠻其秋雒容蠻  
出掠遣指揮王綸破之雲上綸功並劾其殺良民罪帝  
宥綸而心重雲廣西自韓觀卒後諸蠻漸橫雲以廣西

兵少留貴州兵為用先後討平潯柳平樂桂林宜山思恩諸蠻九年又以慶遠鬱林苗獠非大創不服請濟師詔發廣東兵千五百人益雲雲分道剿捕禽斬甚衆復遣指揮田真攻大藤峽賊破之雲在鎮先後大戰十餘斬首萬二千二百六十降賊酋三百七十奪還男女二千五百八十築城堡十三舖舍五百陶磚鑿石增高益厚自是獠獠屏跡居民安堵論功進都督同知璽書褒勞雲謀勇深沉而端潔不苟取公賞罰嚴號令與士卒

同甘苦臨機應變戰無不捷廣西鎮帥初至土官率饋  
獻為故事帥受之即為所持雲始至聞府隸鄭牢剛直  
召問曰饋可受乎牢曰潔衣被體一污不可湔將軍新  
潔衣也雲曰不受彼且生疑奈何牢曰黷貨法當死將  
軍不畏天子法乃畏土夷乎雲曰善盡却饋獻嚴馭之  
由是土官畏服調發無敢後者雲所至詢問里老撫善  
良察誣枉土人皆愛之英宗即位雲墜馬傷股帝遣醫  
馳視以病請代優詔不許進右都督正統二年上言得

州與大藤峽諸山相錯猺寇出沒占耕旁近田左右兩  
江土官所屬人多田少其狼兵素勇為賊所畏若量撥  
田州土兵於近山屯種分界耕守斷賊出入不過數年  
賊必坐困報可嗣後東南有急輒調用狼兵自此始也  
明年冬卒於鎮贈懷遠伯諡忠毅長子俊襲府君前衛  
指揮使廣西人思雲不置立祠肖像祀焉初韓觀鎮廣  
西專殺戮慶遠諸生來迓觀曰此皆賊覘我也悉斬之  
雲平恕叅佐有罪輒上請不妄殺人人亦不敢犯鄭平

嘗逮事觀觀醉輒殺人牢輒留之醉乃以白牢為士大夫所重然竟以隸終

蕭授華容人由千戶從成祖起兵至都指揮同知永樂十六年擢右軍都督僉事充總兵官鎮湖廣貴州宣德元年鎮遠邛水蠻銀總作亂指揮祝貴往撫被殺授遣都指揮張名破斬之貴州宣慰所轄乖西巴香諸洞寨山箐深險諸蠻錯居攻剽他部傷官軍發民塚而昆阻比諸寨亦恃險不輸賦二年授遣都指揮蘇保會宣慰

宋斌攻破昆阻比寨窮追斬偽王以下數百人乖西諸蠻皆震懾歸命水西蠻阿閉妨宜作亂授結旁寨酋以計誅之而西堡蠻阿骨等與寨底豐寧清平平越普安諸苗復相聚為寇四川筠連諸蠻應之授且捕且撫諸蠻先後聽命承制赦之以豐寧酋稔惡械送京師伏誅七年諭降安隆酋岑俊已討辰州蠻禽其酋八十斬馘無算移兵擊江華苗討富川山賊先後破禽之先是貴州治古答意二長官司苗數出掠授築二十四堡環其

地分兵以戍賊不得逞久之其酋吳不爾覘官軍少復掠清浪殺官吏授遣張名擊破之賊走湖廣境結生苗勢復張授乃發黔楚蜀軍分道捕討進軍竿子坪誅不爾斬首五百九十餘級賊悉平九年都勻蠻為亂引廣西賊入掠授遣指揮陳原顧勇分道邀擊獲賊首韋萬良等降下合江蔡郎等五十餘寨英宗即位命佩征蠻副將軍印鎮守如故念授年老以都督僉事吳亮副之正統元年普定蠻阿遲等叛僭稱王四出攻掠授遣顧



勇等擣其巢破之而廣西蒙顧十六洞與湖廣逃民相聚蜂起授督兵圍之再戰悉禽斬其酋餘黨就誅捷聞進右都督上言靖州與廣西接壤時苦苗患永樂宣德間嘗儲糧數萬石備軍興比年儲糧少有警發人徒轉輸賊輒先覺以故不能得賊乞於清浪靖州二衛各增儲五萬石庶緩急可藉報可四年貴州計沙賊苗金蟲苗總牌糾紅江生苗作亂僞立統千侯統萬侯號授督兵抵計沙分遣都指揮鄭通攻三羊洞馬暝攻黃栢山

大破之吳亮窮追至蒲頭紅江斬總牌千戶尹勝誘斬  
金蟲於是生苗盡降授沉毅多計算裨校皆盡其材而  
馭軍嚴整自鎮遠侯顧成歿羣蠻所在屯結官軍討之  
皆無功授在鎮二十餘年規畫多本於成久益明練威  
信大行寇起輒滅前後諸帥莫及也論功進左都督是  
年六月召還以老致仕尋起視事右府十年卒贈臨武  
伯謚靖襄吳亮來安人永樂初為旗手衛指揮僉事宜  
德中署湖廣都指揮僉事尋以右副總兵與王瑜督漕

運英宗初討新淦賊有功累進都督僉事副授鎮湖廣  
貴州破普定蠻進都督同知平計沙苗進右都督方政  
歿於麓川召亮還京命為副總兵將兵五萬往討至雲  
南賊益熾坐金齒叅將張榮敗不救逮下獄左遷都督  
僉事仍佩征南副將軍印鎮湖廣貴州討平四川都掌  
蠻尋召還視右府事正統十一年卒亮姿貌魁梧性寬  
簡不喜殺僇所至蠻人懷附好讀書至老手不釋卷  
方瑛都督政之子正統初以舍人從父征麓川父戰死

瑛發憤矢報父讐初襲指揮使已論政死事功遷都指揮同知六年從王驥征麓川師兵六千突賊壘賊渠衣黃衣帳中瑛直前左右擊斬數百人躡死者無算遂平其地進都指揮使尋復從驥破貢章沙壩阿嶺諸蠻進都督僉事浚後府事充右叅將協守雲南十三年復從驥征麓川破鬼山大寨留鎮雲南景泰元年廷議以瑛有將略命都督毛福壽代還進都督同知甫抵京而貴州羣苗叛道梗驥請瑛還討其年四月拜右副總兵與

保定伯梁瑄侍郎侯璉次第破走之進右都督復破賞  
改諸砦禽偽苗王王阿同等璉卒都御史王來代督軍  
務分道擊賊香爐山瑛入自龍場大破平之三年秋來  
劾瑛違法事置不問來召還命瑛鎮守貴州其冬討白  
石崖賊俘斬二千五百人招降四百六十砦進左都督  
五年四川草塘苗黃龍韋保作亂自稱平天大王剽播  
州西坪黃灘英與巡撫蔣琳會川兵進剿賊魁皆就縛  
因分兵克中潮山及三百灘乖西谷種乖立諸砦執偽

王谷蟻丁等斬首七千餘詔封南和伯瑛為將嚴紀律  
信賞罰臨陳勇敢善撫士士皆樂為用以故數有功廷  
臣言宜委以禁旅乃召還同石亨督京營軍務明年琳  
奏瑛前守貴州邊境寧苗蠻畏服乞遣還帝不許未幾  
湖廣苗叛拜瑛平蠻將軍率京軍討之而使御史張鵬  
偵其後還奏瑛所過秋毫不犯帝大喜七年賊渠蒙能  
攻平溪衛都指揮鄭泰等擊却之能中火槍死瑛遂進  
沅州連破鬼板等一百六十餘砦與尚書石璞移兵天

柱率陳友等分擊天堂諸砦復大破之克砦二百七十禽僞侯伯以下一百二人時英宗已復位捷聞璞召還瑛留鎮貴州湖廣瑛討蒙能餘黨克銅鼓藕洞一百九十五砦覃洞上隆諸苗各斬其渠納欵帝嘉瑛功進侯天順二年貴東苗干把豬等僭偽號攻都勻諸衛命瑛與巡撫白圭合川湖雲貴軍討之克六百餘砦邊方悉定瑛前後克砦幾二千俘斬四萬餘平苗之功前此無與比者尋卒於鎮年四十五帝震悼賜諡忠襄瑛天姿

英邁曉古兵法嘗上練兵法及陣圖老將多稱之為人  
廉和不伐所至鎮以安靜民思之久而不忘子毅嗣伯  
爵謫祖母誣從父瑞不孝坐奪爵閒住卒子壽祥嗣正  
德中歷鎮貴州湖廣傳爵至明亡乃絕陳友其先西域  
人家全椒正統初官千戶累遷都指揮僉事頻年使衛  
拉特有勞尋復進都指揮使九年充寧夏游擊將軍與總  
兵官黃真擊烏梁海多獲進都督僉事未幾出塞招達  
哈布等四百人來歸景帝即位進都督同知征湖廣貴



州苗尋充左叅將守備靖州景泰二年偕王來等擊賊  
香爐山自萬潮山入大破之留鎮湖廣論功進右都督  
四年春奏斬苗五百餘級五年又奏斬苗三百餘而都  
指揮戚安等八人戰死兵部疑首功不實指揮蔡昇亦  
奏友欺妄命總督石璞廉之斬獲僅三四十人陷將士  
千四百人宜罪詔令殺賊自効天順元年隨瑛征天堂  
諸苗大獲命充左副總兵仍鎮湖廣已又偕瑛破蒙能  
餘黨召封武平伯子世券保喇犯邊充游擊將軍從安

遠侯柳溥等往禦率都指揮趙瑛等與戰敵敗遁再犯  
鎮番復擊却之俘百六十人尋佩將軍印充總兵官討  
寧夏寇先是寇大入甘涼溥及總兵衛穎等不能禦惟  
友稍獲至是巡撫芮釗列諸將失事狀兵部請免友罪  
詔並宥溥等召還進侯卒傳子至孫綱弘治中請友贈  
諡詔贈沔國公諡武僖綱傳子勲及熹嘉靖中吏部以  
友征苗功多冒濫請停襲帝不從熹子大策復得嗣至  
明亡乃絕

征烏梁海有功進都指揮僉事已從王驥平麓川進同  
知景帝即位充貴州右叅將擊苗於偏橋敗之景泰二  
年從王來征韋同烈破鎖兒流源諸砦俘斬千六百人  
共克香爐山獲同烈進都指揮使守靖州尋坐罪徵還  
方瑛討苗乞震隨軍詔許立功贖已從瑛大破天堂諸  
苗仍充左叅將瑛平銅鼓諸賊震亦進武崗克牛欄等  
五十四砦斬獲多進都督僉事天順中復從瑛平貴東

苗干把豬瑛卒即以震充總兵官代鎮貴州湖廣初麻城人李添保以逋賦逃入苗中偽稱唐太宗後衆萬餘僭王建元武烈剽掠遠近震進擊大破之添保遁入貴州鬼池諸苗中復誘羣苗出掠震禽之送京師尋破西堡苗五年春剿城步猺撞攻橫水城溪莫宜中平諸砦皆破之長驅至廣西西延會總兵官過興軍克十八團諸猺前後俘斬數千人其冬命震專鎮湖廣以李安充總兵守貴州明年夏率師由錦田江華抵雲川貴嶺橫

江諸砦破，擒俘斬二千八百餘人。七年冬，苗據赤谿浦，洞長官司震與安分道進斬賊渠飛天侯等，破砦二百，遂復長官司。進都督同知明年冬，廣西猺侵湖南，夜入桂陽州，大掠。震遣兵分道追擊，連敗之，俘斬千餘人。成化改元，守備靖州都指揮同知莊榮奏貴州黎平諸府密邇湖廣，五開諸衛非大將總領不可，乃復命震兼鎮貴州。未幾，獲賊首苗蟲蝦，剽囊賊劉千斤石和尚為亂，震進討賊，屢敗，乘勝追及於梅溪，賊巢官軍不利，都指

揮以下死者三十八人有詔切責白圭等大軍至震自  
南漳進兵合擊大破之賊遂平論功進右都督時武崗  
沅靖銅鼓五開苗復蜂起而貴州亦告警震言貴州終  
難遙制請專鎮湖廣許之乃還兵由銅鼓天柱分四道  
進連破賊直抵清水江因苗為導深入賊境兩月間破  
巢八百焚廬舍萬三千斬獲三千三百而廣西徭剗桂陽  
者亦擊斬三千八百有奇當是時震威名著西南苗獠  
聞風畏懾呼為金牌李七年與項忠討平流賊李原招

撫流民九十萬人荆襄遂定語具忠傳十一年苗復犯武崗靖州湖湘大擾震與巡撫劉敷等分五道進破六百二十餘砦俘斬八千五百餘人獲賊孥萬計論功封興寧伯時武靖侯趙輔寧晉伯劉聚皆以功封論者多訾議之獨震功最高人無異言叅將吳經者與震有隙第千戶綬為汪直腹心經屬綬譖之會直方傾項忠詞連震遂逮下獄奪爵降左都督南京閒住未幾直遣校尉緝事言震陰結守備太監覃包私通貨賂帝怒遣

直赴南京數色等罪責降色孝陵司香勒震回京直敗  
震訴復爵尋卒震在湖湘久熟知苗情善用兵一時征  
苗功方瑛後震為最然貪功好進事交結竟以是敗

王信字君實南鄭人生半歲父忠征北戰歿母岳氏苦  
節育之後俱獲旌正統中信襲寬河衛千戶成化初積  
功至都指揮僉事守備荆襄劉千斤反信以房縣險進  
據之民兵不滿千人賊衆四千突至圍其城拒四十餘  
日選死士出城五六里舉礮賊疑援至驚走追敗之已



白圭統大軍至以信為右叅將分道抵後巖山賊遂滅  
論功進都指揮同知賊黨石龍復陷巫山信與諸將共  
平之而流民仍嘯荆襄南陽間信以為憂言於朝即命  
信兼督南陽軍務賊首李原等果亂信復與項忠討平  
之擢署都督僉事鎮守臨清十三年以本官佩平蠻將  
軍印移鎮湖廣永順保靖二宣慰世相讐殺信諭以禍  
福兵即解靖州及武崗蠻久不戢守臣議剿之信親詣  
犒以牛酒責其無狀衆稽顙服罪十七年疏言湖廣諸

蠻雖腹心蠹實無能為久不靖者由我將士利其竊發  
以邀功也選精銳慎隄防其患自息荆襄流通本避徭  
役濫誅恐傷天和南畝之氓咸無蓄積收穫未幾餽糧  
已空機杼方停布縷何在乞選公正仁惠守令加意撫  
綏濫授冗員無慮千百無一矢勞冒崇階之賞乞察勘  
削奪部指揮劉斌張全智勇力薦於朝且云英雄之士  
處心剛正安肯俯首求媚若不加意延訪則志士沉淪  
朝廷安得而用之二十一年巡撫馬馴等言副總兵周

賢叅將彭倫官皆都督僉事而信反止署職宜量進一秩以重其權兵部言信無軍功帝特擢為都督同知頃之改總督漕運帥府舊有湖擅為利信開以泊漕艘勢要壅水一裁以法漕務修舉明年卒信沉毅簡重好觀書被服儒雅厯大鎮不營私產嘗曰儉足以久死後不累子孫所遺多矣故人婚喪傾資助之子繼善從善皆舉進士繼信總漕運者寧津都勝合肥郭鉉勝襲職南京羽林左衛指揮僉事鉉襲彭城衛指揮使成化初勝

擢署都指揮僉事而鉉亦以從征荔浦功進都指揮僉事中武舉遷同知勝備倭揚州擊敗鹽徒為亂者尹旻等舉勝將才鉉亦為張懋所舉乃命勝充叅將協同漕運而鉉代之備倭陝西大饑勝奉詔輸米百萬石往振信卒遂遷署都指揮使充總兵官代之鉉代勝為叅將弘治中勝以都督僉事帶俸南京前府時鉉已鎮守廣西副總兵破府江獍賊遂以時望擢總漕運鉉沉毅有將略而勝無汗馬勲徒以居官廉靜故頻有任使歷任

五十七年所處皆膏腴地而自奉簡淡日食止豆腐時  
因以為號鉉累進都督同知凡軍民利病多陳於朝嘗  
濬通州河二十里置壩令淺船搬運歲省白金數萬當  
孝宗時朝政整肅文武大臣率得人鉉筦漕十三年不  
易正德初始召佐後府尋卒

彭倫初職為湖廣永定衛指揮使累功至都指揮同知  
成化初從趙輔平太藤峽賊進都指揮使守備貴州清  
浪諸處討破茅坪銅鼓叛苗賊掠乾溪倫討之賊還所

掠與盟而退倫以賊入時道邛水諸砦不即邀遏乃下令賊入境能生致者予重賞縱者置諸法由是諸司各約所屬凡生苗輒入即禽之送帳下者累累倫大會所部目把縛俘囚寘高竿集健卒亂射殺之復割裂肢體烹噉諸壯士罪輕者截耳鼻使去曰以此識再犯不赦矣因令諸砦樹牌為界羣苗股栗不敢犯明年充右叅將仍鎮清浪益盡心邊計戎事畢舉妖賊石全州潛入絞洞煽動古州苗洪江甘篆諸苗咸應之倫遣兵截禽

並搜獲其妻子諸苗將攻鎮遠倫大敗之斬首及墮崖死者無算無何邛水十四砦苗糾洪江生苗為逆倫分五哨往甫行雨如注倫曰賊不虞我急趨之可得志也競進夾攻繫其魁俘斬餘黨賊盡平靖州苗亂湖廣總兵官李震檄倫會討軍至邛水江諸熟苗驚欲竄倫與僉事李晃計曰苗竄必助賊乃急撫定之又緣道降天堂小坪諸苗既抵靖州倫將右哨出賊背布營賊走據高山倫軍仰攻之賊敗走遂渡江搥其巢大獲乘勝攻

白崖塘崖高萬仞下臨深淵稱絕險倫會左哨同進得  
徑路夜登賊倉皇潰追斬二千餘級俘獲如之盡夷其  
砦初臻剖六洞苗侵熟苗田不輸賦又不供驛馬有司  
莫敢問倫遣人諭之頓首請如制錄功進都督僉事久  
之御史鄧庠員外郎費瑄勘事貴州總兵官吳經等皆  
被劾獨薦倫智謀老成弘治中經論罷即以倫代倫用  
師先計後戰故多功四年以老致仕卒子卹如制

歐磐潞人襲世職指揮使成化中擢廣東都指揮僉事



屢剿蠻寇有功用總督朱英薦充廣西右叅將分守柳州慶遠與左叅將馬義討融縣八峒猺克之師旋餘賊復出掠被劾帝絀磐等功但卹死事家猺賊方公強亂兵部刻總鎮中官顧恒並及磐常謫戍督撫奏磐所守乃猺獞出沒地磐募死士夜入賊巢斬其渠胡公返威震羣蠻論功可贖罪帝乃宥之還故任二十三年鬱林陸川賊黃公定胡公明等亂磐偕按察使陶魯等分五道攻破之進都指揮同知弘治初謝病解職總督奏絃

言磐多歷戰陣有才守乞起用詔還任八年府江永  
安諸獍亂總督閔珪調兵六萬分四哨往討磐自象州  
修仁直搗陸峒所向摧破已偕諸軍連破山砦百八十  
斬首六千有奇進都指揮使遷廣西副總兵思恩土官  
岑濬築石城於丹良莊截江括商利帥府令毀之不聽  
磐自田州還督兵將毀城濬率衆拒擊敗之卒夷其城  
都御史鄧廷瓚等以磐功多言於朝進都督僉事十五  
年命佩平蠻將軍印鎮守湖廣磐為將廉能得士久鎮

南邦蠻人畏服十八年請老又二年卒祭葬如制

張祐字天祐廣州人幼好學能文弘治中襲世職為廣州右衛指揮使年十九從總督潘蕃從南海寇禍元祖先登有功正德二年擢署都指揮僉事守備德慶瀧水猛獍負險者聞其威信稍稍遁去總督林廷選引為中軍事無大小咨焉守備惠潮擣盜魁劉文安李通寶穴平之遷廣西右叅將分守柳慶總督陳金討府江賊命祐進沈沙口大破之增俸一等擢副總兵鎮守廣西尋

進署都督僉事古田諸猺獠亂祐言先年征討率倚兩江土兵賞不酬勞今調多失期乞定議優賚從之督都指揮沈希儀等討臨桂灌陽諸猺斬首五百餘級璽書獎勞又連破古田賊俘斬四千七百進署都督同知己復討平洛容肇慶平樂諸蠻增俸一等蔭子世百戶嘉靖改元母喪哀毀骨立尋以疾乞休還衛初上思州土目黃鏐作亂祐購其黨黃廷寶縛獻之總督張嶺惡祐不白已至劾祐懷奸避難逮繫德慶獄數上書訟冤釋

令閒住盧蘇王受亂田州總督姚鎮召至軍中待以賓禮多所裨贊後王守仁代鎮詢撫剿之宜祐曰以夷治夷可不煩兵而下守仁納之蘇受果效順因命祐部分其衆事寧守仁言思田初定宜設一副總兵鎮之請即以命祐報可破封川賊盤古子又剿廣東會寧劇賊邱區長等斬首一千二百勒銘大隆山十一年楊春賊趙林花陷高州總督陶諧檄祐討深入多所斬獲忽中危疾卒軍中為哀慟祐身長八尺智識絕人馭軍有節制

與下同甘苦不營私產性好書每載以自隨軍暇即延  
儒生講論嘗過烏蠻灘謁馬伏波祠太息曰歿不俎豆  
其間非夫也題詩而去後田州人立祠橫山祀之

贊曰苗蠻阻險自固易動難服自其性然而草薶禽獮  
濫殺邀功貪貨賄興事端控馭乖方綏懷無策則鎮將  
之過也韓觀諸人功最焯著皆以威信震懾蠻荒若山  
雲王信張祐之廉儉有守雖士君子何以過故尤足尚  
云

明史卷一百六十六

欽定四庫全書

明史卷一百六十六考證

方瑛傳瑛前後克砦幾二千俘斬四萬餘平苗之功前此無與比者尋卒於鎮

臣

黃壽齡按識大錄平苗

之後朝廷方將論功行賞而瑛卒史畧之謹識

李震傳獲賊孥萬計論功封興寧伯

臣

黃壽齡按識

大錄論功封興寧伯復食祿一千石史畧之謹識

李震傳會直方傾項忠詞連震遂下詔獄

臣

黃壽齡



按震逮獄史但言直方傾項忠詞連震究未詳其原委考識大錄奏震嘗私遣項忠造室侵地下錦衣獄拷掠備至震遂誣服革爵較史特詳謹識

明史卷一百六十六考證

欽定四庫全書

明史卷一百六十七

大學士張廷玉等奉 敕修

列傳第五十五

曹鼎 張益

廊埜

王佐 丁鉉等

孫祥 謝澤

袁彬 哈銘  
袁敏

曹鼎字萬鍾寧晉人少伉爽有大志事繼母以孝聞宣

德初由鄉舉授代州訓導願授別職改太和縣典史七年督工匠至京師疏乞入試復中順天鄉試明年舉進士一甲第一賜宴禮部進士宴禮部自鼐始入翰林為修撰正統元年充經筵講官宣宗實錄成進侍講錫三品章服五年以楊榮楊士奇薦入直文淵閣參預機務鼐為人內剛外和通達政體榮既歿士奇常病不視事閣務多決於鼐帝以為賢進翰林學士十年進吏部左侍郎兼學士十四年七月額森入寇中官王振挾帝親

征朝臣交章諫不聽。鼂與張益以閤臣扈從未至大同。士卒已乏糧。宋瑛朱冕全軍沒。諸臣請班師。振不許。趣諸軍進。大將朱勇膝行聽命。尚書鄺埜王佐跪草中。至暮不得請。欽天監正彭德清言天象示警。若前恐危。乘輿振詈曰。爾何知。若有此。亦天命也。鼂曰。臣子固不足惜。主上繫天下安危。豈可輕進。振終不從。前驅敗報踵至。始懼。欲還定襄。侯郭登言於鼂。益曰。自此趨紫荆。裁四十餘里。駕宜從紫荆入振。欲邀帝至蔚州。幸其第。不

聽復折而東趨居庸八月辛酉次土木地高掘二丈不  
及水衛拉特大至據南河明日佯却且遣使通和帝召  
鼐草詔答之振遽令移營就水行亂寇騎蹂陣入帝哭  
圍不得出寇擁以去鼐並等俱及難景帝立贈鼐少傅  
吏部尚書文淵閣大學士謚文襄官其子恩大理評事  
英宗復位加贈太傅改謚文忠復官其孫榮錦衣百戶  
鼐弟鼎進士歷吏科都給事中張並字士謙江寧人永  
樂十三年進士由庶吉士授中書舍人改大理評事與

修宣宗實錄成改修撰博學強記詩文操筆立就三楊  
雅重之尋進侍讀學士正統十四年入文淵閣未三月  
遽蒙難以歿景帝立贈學士謚文僖曾孫琮進士嘉靖  
初歷官南京右都御史

鄭埜字孟質宜章人永樂九年進士授監察御史成祖  
在北京或奏南京鈔法為豪民沮壞帝遣埜廉視衆謂  
將起大獄埜執一二市豪歸奏曰市人聞令震懼鈔法  
通矣事遂已倭犯遼東戍守失律者百餘人皆應死命

堃按問具言可矜狀帝為宥之營造北京執役者鉅萬命堃稽省病者多不死十六年有言秦民羣聚謀不軌者擢堃陝西按察副使敕以便宜調兵勦捕堃白其誣詔誅妄言者宣德四年振闕中饑在陝久刑政清簡父憂服除擢應天府尹蠲苛急政市征田稅皆酌其平正統元年進兵部右侍郎明年尚書王驥出督軍堃獨任部事時邊陲多警將帥乏人堃請令中外博舉謀畧材武士以備任使六年山東災堃請寬民間孳牧馬賠償

之令以甦其力十年進尚書舊例諸衛自百戶以下當代者必就試京師道遠無資者終身不得代埜請就各都司試之人以為便衛拉特額森勢盛埜請為備又與廷臣議上方畧請增大同兵擇智謀大臣巡視西北邊務尋又請罷京營兵修城之役令休息以備緩急時不能用額森入寇王振主親征不與外廷議可否詔下埜上疏言額森入犯一邊將足削之陛下為宗廟社稷主奈何不自重不聽既扈駕出關力請回鑾振怒令與戶



部尚書王佐皆隨大營堃陞馬幾殆或勸留懷來城就醫堃曰至尊在行敢託疾自便手車駕次宣府朱勇敢沒堃請疾驅入闕嚴兵為殿不報又詣行在申請振怒曰腐儒安知兵事再言者死堃曰我為社稷生靈言何懼振叱左右扶出堃與佐對泣帳中明日師覆堃死年六十五堃為人勤廉端謹性至孝父子輔為句容教官教堃甚嚴堃在陝久思一見父乃謀聘父為鄉試考官父怒曰子居憲司而父為考官何以防閑馳書責之堃

又嘗寄父褐復貽書責曰汝掌刑名當洗冤釋滯以無  
忤任使何從得此褐乃以污我封還之楚奉書跪誦泣  
受教景泰初贈楚少保官其子儀為主事成化初謚忠  
肅

王佐海豐人永樂中舉於鄉卒業太學以學行聞擢吏  
科給事中器宇凝重奏對詳雅為宣宗所簡注宣德二  
年起拜戶部右侍郎以太倉臨清德州淮徐諸倉多積  
弊敕佐巡視平江伯陳瑄言漕卒十二萬人歲漕艱苦

乞僉南方民如軍數更番轉運詔佐記瑄及黃福議之  
佐還奏東南民力已困議遂寢受命治通州至直沽河  
道已赴宣府議屯田事宜英宗初立出鎮河南奏言軍  
衛收納稅糧奸弊百出請變其制廷議自邊衛外皆改  
隸有司尋召還命督理甘肅軍餉正統元年理長蘆鹽  
課三年提督京師及通州倉場所至事無不辦六年尚  
書劉中敷得罪召理部事尋進尚書十一年承詔訊安  
鄉伯張安兄弟爭祿事坐與法司相諉被劾下吏獲釋

時軍旅四出耗費動以鉅萬府庫空虛佐從容調劑節  
縮有方在戶部久不為赫赫名而寬厚有度政務糾紛  
未嘗廢學人稱其君子土木之變與鄭埜丁鉉王永和  
鄧榮同死難贈少保官其子道戶部主事成化初謚忠  
簡丁鉉字用濟豐城人永樂中進士授太常博士歷工  
刑吏三部員外郎進刑部郎中正統三年起拜刑部侍  
郎九年出理四川茶課奏減其常數以俟豐歲振饑江  
淮及山東河南民咸賴之平居恂恂若無能臨事悉治

辨從征歿贈刑部尚書官其子琥大理評事後謚襄愍  
王永和字以正崑山人少至孝父病伏枕十八年侍湯  
藥無少懈永樂中舉於鄉歷嚴州饒州訓導以襄義薦  
為兵科給事中嘗劾都督王彥鎮薊州縱寇及錦衣馬  
順不法事持節冊韓世子妃糾中官蹇傲罪以勁直聞  
正統六年進都給事中八年擢工部右侍郎從征歿贈  
工部尚書官其子汝賢大理評事後謚襄敏鄧榮字孟  
擴南城人永樂末年進士授監察御史奉敕巡按蘇松

諸府期滿將代去父老赴闕乞留得請旋以憂去宣德  
十年陝西關按察使詔廷臣舉清慎有威望者楊士奇  
薦榮遂以命之正統十年入為右副都御史北征扈從  
師出居庸闕疏請回鑾以兵事專屬大將至宣府大同  
後再上章皆不報及遇變同行者語曰吾輩可自脫去  
榮曰鑿輿失所我尚何歸主辱臣死分也遂死贈右都  
御史官其子瑞大理評事後謚襄敏英宗之出也備文  
武百官以行六師覆於土木將相大臣及從官死者不

可勝數英國公張輔及諸侯伯自有傳其餘姓氏可考者卿寺則龔全安黃養正戴慶祖王一居劉容凌壽給事御史則包良佐姚銑鮑輝張洪黃裳魏貞夏誠申祐尹竑童存德孫慶林祥鳳庶寮則齊汪馮學明王健程思溫程式遠端俞鑑張瑋鄭瑄俞拱潘澄錢曷馬預尹昌羅如墉劉信李恭石玉景帝立既贈卹諸大臣自給事御史以下皆降敕褒美錄其子為國子生一時卹典墓備云龔全安蘭谿人進士授工科給事中累遷左通

政歿贈通政使黃養正名蒙以字行瑞安人以善書授中書舍人累官太常少卿歿贈太常卿戴慶祖漂陽人王一居上元人俱樂舞生累官太常少卿歿俱贈太常卿包良佐字克忠慈谿人進士授吏科給事中鮑輝字淑大浙江平陽人進士授工科給事中數有建白張洪安福人黃裳字元吉曲江人俱進士授御史裳嘗言寧紹台三府疫死三萬人死者宜蠲租存者宜振恤巡視兩浙鹽政請卹水災報可魏貞懷遼人進士官御史申



祐字天錫貴州婺川人父為虎齧祐特挺奮擊之得免  
舉於鄉入國學帥諸生救祭酒李時勉旋登進士拜四  
川道御史以謇諤聞尹竑字太和巴人童存德字居敬  
蘭谿人俱進士官御史林祥鳳字鳴臯莆田人由鄉舉  
授訓導擢御史齊汪字源澄天台人以進士歷兵部車  
駕司郎中程思溫婺源人程式常熟人逢端仁和人俱  
進士官員外郎俞鑑字元吉桐廬人以進士授兵部職  
方司主事駕北征郎中胡寧當從以病求代鑑慷慨許

諾或曰家遠子幼奈何鑑曰為國臣子敢計身家尚書  
鄭埜知其賢數與計事鑑曰惟力勸班師耳時不能用  
張瑄字廷玉慈谿人進士授刑部主事尹昌吉水人進  
士官行人司正羅如壩字本崇廬陵人進士授行人從  
北征瀕行訣妻子誓以死報國屬翰林劉儼銘其墓儼  
驚拒之如壩笑曰行當驗耳後數日果死劉容太僕少  
卿凌壽尚寶少卿夏誠孫慶皆御史馮學明郎中王健  
員外郎俞拱潘澄錢曷皆中書舍人馬預大理寺副劉

信夏官正李恭石玉序班里居悉無考

孫祥大同人正統十年進士授兵科給事中擢右副都御史守備紫荆關額森逼關都指揮韓青戰死祥堅守四日額森由間道入夾攻之闕破祥督兵巷戰兵潰被殺言官誤劾祥棄城遁寇退有司修闕得其屍戰地焚而瘞之不以聞祥弟祺詣闕言寃詔卹其家成化改元錄其子紳為大理寺右評事又謝澤者上虞人永樂十六年進士由南京刑部主事出為廣西參政正統末擢

通政使守備白羊口王師敗於土木守邊者無固志潭  
與具子儼訣而行受事未數日額森兵大入守將呂鐸  
遁澤督兵扼山口大風揚沙不辨人馬或請移他處避  
敵澤不可寇至衆潰澤按劍厲聲叱賊遂被殺事聞遣  
官葬祭錄儼為大理評事

袁彬字文質江西新昌人正統末以錦衣校尉扈帝北  
征土木之變額森擁帝北去從官悉奔散獨彬隨侍不  
離左右額森之犯大同宣府逼京師皆奉帝以行上下

山坂涉溪澗冒險彬擁護不少懈帝駐蹕土城欲奉書皇太后貽景帝及諭羣臣以彬知書令代草帝既入沙漠所居止毳帳敝幃旁列一車一馬以備轉徙而已彬周旋患難未嘗違忤夜則與帝同寢天寒甚恒以脅溫帝足有哈銘者蒙古人幼從其父為通事至是亦侍帝帝宣諭額森及其部下嘗使銘額森輩有所陳請亦銘為轉達帝獨居檀廬南望悒鬱二人時進諧語慰帝帝亦為解顏中官喜寧為額森腹心額森嘗謂帝曰中

朝若遣使來皇帝歸矣帝曰汝自送我則可欲中朝遣使徒費往返爾寧聞怒曰欲急歸者彬也必殺之寧勸額森西犯寧夏掠其馬直趨江表居帝南京彬銘謂帝曰天寒道遠陛下又不能騎空取凍饑且至彼而諸將不納奈何帝止寧計寧又欲殺二人皆帝力解而止額森將獻妹於帝彬請駕旋而後聘帝竟辭之額森惡彬銘二人欲殺者屢矣一日縛彬至曠埜將支解之帝聞如失左右手急趨救乃免彬嘗中寒帝憂甚以身壓其

背汗浹而愈帝居漠北期年視彬猶骨肉也及帝還京  
景帝僅授彬錦衣試百戶天順復辟擢指揮僉事尋進  
同知帝眷彬甚奏請無不從內閣商輅既罷彬乞得其  
居第既又以湫隘乞官為別建帝亦報從彬娶妻命外  
戚孫顯宗主之賜予優渥時召入曲宴敘患難時事歡  
洽如故時其年十二月進指揮使與都指揮僉事王喜  
同掌衛事二人嘗受中宮夏時囑私遣百戶季福偵事  
江西福者帝乳媪夫也詔問誰所遣二人請罪帝曰此

必有主使者遂下福吏得二人受囑狀所司請治時及  
二人罪帝宥時二人贖徒還職而詔自今受囑遣官者  
必殺無赦已而坐失囚喜解職彬遂掌衛事五年秋以  
平曹欽功進都指揮僉事時門達恃帝寵勢傾朝野廷  
臣多下之彬獨不為屈達誣以罪請逮治帝欲法行語  
之曰任汝往治但以活袁彬還我達遂鍛鍊成獄賴漆  
工楊塤訟寃獄得解然猶調南京錦衣衛帶俸閒住語  
詳達傳越二月英宗崩達得罪貶官都勻召彬復原職




仍掌衛事未幾達微下獄充軍南丹彬餞之於郊餽以  
贐成化初進都指揮同知久之進都指揮使先是掌錦  
衣衛者率張權勢罔財賄彬任職久行事安靜十三年  
擢都督僉事涖前軍都督府卒於官世襲錦衣僉事哈  
銘從帝還賜姓名楊銘歷官錦衣指揮使數奉使外蕃  
為通事孝宗嗣位汰傳奉官銘以塞外侍衛功獨如故  
以壽卒於官袁敏者金盞衛知事也英宗北征應募從  
至大同及駕還駐萬全左衛敏見敵騎逼請留精兵三

四萬人扼其衝而車駕疾驅入闕王振不納六師遂覆  
敏跳還上書景帝曰上皇曩居九重所服者袞繡所食  
者珍羞所居者瓊宮瑤室今駕陷沙漠服有袞繡乎食  
有珍羞乎居有宮室乎臣聞之主辱臣死上皇辱至此  
臣子何以為心臣不惜碎首刳心乞遣官一人或就令  
臣齋書及服御物問安塞外以盡臣子之義臣雖萬死  
心實甘之命禮部議竟報寢

贊曰異哉土木之敗也寇非深入之師國非積弱之勢

徒以宦豎竊柄狎寇弄兵逆衆心而驅之死地遂致六  
師撓敗乘輿播遷大臣百官身膏草野固英宗自貽伊  
戚而諸臣當倉皇奔潰之時相率捐軀雖不能禦患而  
於主辱臣死之義亦庶幾無愧矣



明史卷一百六十七

欽定四庫全書

明史卷一百六十七考證

曹鼎傳事繼母以孝聞

臣黃壽齡按獻徵錄定制母

止封一人正統十二年鼎陳情乞將前母孟氏一體

追贈詔允之不為後例蓋特恩也史未詳載謹附識

贊末固英宗自貽伊戚而諸臣當倉皇奔潰之時相率

捐軀雖不能禦患而於主辱臣死之義亦庶幾無愧

矣臣黃壽齡按原本贊末喻失當於褒貶之義義

未合今擬酌加改正

明史卷一百六十七考證

欽定四庫全書

史部

明史卷一百

六十八至  
七十

御史<sub>臣</sub>李陽祜覆勘

總校官編修<sub>臣</sub>朱鈐

欽定四庫全書

明史卷一百六十八

大學士

張廷玉等奉

敕修

列傳第五十六

陳循

王文

江淵

許彬

陳文

萬安  
彭華

劉珣

劉吉

尹直

陳循字德遵秦和人永樂十三年進士第一授翰林修撰習朝廷典故帝幸北京命取祕閣書詣行在遂留侍馬洪熙元年進侍講宣德初受命直南宮日承顧問賜第玉河橋西巡幸未嘗不從進侍講學士正統元年兼經筵官久之進翰林院學士九年入文淵閣典機務初廷議天下吏民建言章奏皆三楊主之至是榮士奇已卒循及曹鼐馬愉在內閣禮部援故事請帝以楊溥老



宜優閒令循等預議明年進戶部右侍郎兼學士土木之變人心洶懼循居中所言多採納進戶部尚書兼職如故額森犯京師請赦各邊精騎入衛馳檄回番以疑敵帝皆從其計景泰二年以葬妻與鄉人爭墓地為前後巡按御史所不直循輒訐奏給事中林聰等極論循罪帝是聰言而置循不問循本以才望顯及是素譽驟焉二年十二月進少保兼文淵閣大學士帝欲易太子內畏諸閭臣先期賜循及高穀白金百兩江淵王一寧

蕭鑑半之比下詔議循等遂不敢爭加兼太子太傅尋以太子令旨賜百官銀帛踰月帝復賜循等六人黃金五十兩進華蓋殿大學士兼文淵閣如故循子英及王文子倫應順天鄉試被黜相與構考官劉儼黃諫為給事中張寧等所劾帝亦不罪英宗復位于謙王文死杖循百戍鐵嶺衛循在宣德時御史張楷獻詩忤旨循曰彼亦忠愛也遂得釋御史陳祚上疏觸帝怒循婉為解得不死景帝朝嘗集古帝王行事名勤政要典上之河

南江北大雪麥苗死請發帑市麥種給貧民因事進言  
多足採者然久居政地刻躁為士論所薄其嚴譴則石  
亨輩為之非帝意也亨等既敗循自貶所上書自訟言  
天位陛下所固有當天與人歸之時羣臣備法駕大樂  
恭詣南內奏請臨朝非特宮禁不驚抑亦可示天下萬  
世而亨等傲倖一時計不出此卒皆自取禍敗臣服事  
累葉曾著微勞實為所擠惟陛下憐察詔釋為民一年  
卒成化中于謙事雪循子引例請卹乃復官賜祭同邑

蕭鎡字孟勤宣德二年進士需次於家八年帝命楊溥  
合選三科進士拔二十八人為庶吉士鎡為首英宗即  
位授編修正統三年進侍讀久之代李時勉為國子監  
祭酒景泰元年以老疾辭既得允監丞鮑相率六館生  
連章乞留帝可其奏明年以本官兼翰林學士與侍郎  
王一寧並入直文淵閣又明年進戶部右侍郎兼官如  
故易儲議起鎡曰無易樹子霸者所禁矧天朝乎不聽  
加太子少師寰宇通志成進戶部尚書帝不豫諸臣議

復憲宗東宮李賢私問鉉鉉曰既退不可再也英宗復位遂削籍天順八年卒成化中復官賜祭鉉學問該博文章爾雅然性猜忌遇事多退避云

王文字千之初名强束鹿人永樂十九年進士授監察御史持廉奉法為都御史顧佐所稱宣德末奉命治彰德妖賊張普祥獄還奏稱旨賜今名英宗即位遷陝西按察使遭父憂命奔喪起視事正統三年正月擢右副都御史巡撫寧夏五年召為大理寺卿明年與刑部侍

郎何文淵錄在京刑獄尋遷右都御史九年出視延綏  
寧夏邊務劾治定邊營失律都督僉事王禎都督同知  
黃真等罪邊徼為肅明年代陳鑑鎮守陝西平涼臨洮  
鞏昌饑奏免其租尋進左都御史在陝五年鎮靜不擾  
景泰改元召掌院事文為人深刻有城府面目嚴冷與  
陳鑑同官一揖外未嘗接談諸御史畏之若神廷臣無  
敢干以私者然中實柔媚初按大理少鄉薛瑄獄希王  
振指欲坐瑄死至是治中官金英縱家奴不法事但抵

奴罪給事中林聰等劾文鑑畏勢長奸下詔獄二人俱  
伏乃宥之二年六月學士江淵上言法司斷獄多枉文  
及刑部尚書俞士悅求罷且言淵嘗私以事不聽故見  
誣帝兩置之三年春加太子太保時陳鑑鎮陝西將還  
文當代諸御史交章留之乃改命侍郎耿九疇南京地  
震江淮北大水命巡視偕南九卿議上軍民便宜九事  
又言徐淮間饑甚而南京儲蓄有餘請盡發徐淮倉粟  
振貸而以應輸南京者輸徐淮補其缺皆報可是時陳

循最任好剛自用高穀與循不相能以文疆悍思引與  
共政以敵之乃疏請增閣員循舉其鄉人蕭維禎穀遂  
舉文而文得中官王誠助於是詔用文尋自江淮還朝  
改吏部尚書兼翰林院學士直文淵閣二品大臣入閣  
自文始尋遭母喪奪哀如前文雖為穀所引而穀遲重  
循性明決文反與循合而不附穀其後以子倫故欲傾  
考官又用穀言而罷由是兩人卒不相得五年三月江  
淮大水復命巡視先是蘇松常鎮四府糧四石折白銀



一兩民以為便後戶部復徵米令輸徐淮凡一百十餘萬石率三石而致一石有破家者文用便宜停之又發廩振饑民三百六十餘萬時年饑多盜文捕長洲盜許道師等二百人欲張其功坐以謀逆大理卿薛瑄辨其誣給事中王鎮乞會廷臣勘實得為盜者十六人置之法而餘得釋還進少保兼東閣大學士再進謹身殿大學士仍兼東閣初英宗之還也廷臣議奉迎禮文時為都御史厲聲曰公等謂上皇果還耶額森不索土地金

帛而遽送駕來耶衆素畏文皆愕然不決而罷及易儲  
議起文率先承命景帝不豫羣臣欲乞還沂王東宮文  
曰安知上意誰屬乃疏請早選元良以是中外喧傳文  
與中官王誠等謀召取襄世子英宗復位即日與子謙  
執於班內言官劾文與謙等謀立外藩命鞠於廷文力  
辯曰召親王須用金牌信符遣人必有馬牌內府兵部  
可驗也辭氣激壯連車駕主事沈敬按問無迹廷臣遂  
坐謙文召敬謀未定與謙同斬於市諸子悉戍邊敬亦

坐知謀反故縱減死戍鐵嶺文之死人皆知其誣以素  
刻忤且迎駕復儲之議不愜輿論故寃死而民不思成  
化初赦其子還尋復官贈太保謚毅愍倫改名宗彛成  
化初進士歷戶部郎中出理遼東餉中官汪直東征言  
宗彛督餉勞擢太僕少卿弘治中累官南京禮部尚書  
卒謚安簡

江淵字世用江津人宣德五年庶吉士授編修正統十  
二年詔與杜寧裴綸劉儼商輅陳文楊鼎呂原劉俊王

王共十人肄業東閣曹魯等為之師郕王監國徐有貞  
倡議南遷太監金英叱出之踉蹌過左掖門淵遁入迎  
問之有貞曰以吾議南遷不合也於是淵入極陳固守  
之策遂見知於王由侍講起擢刑部右侍郎額森薄京  
師命淵參都督孫鏜軍事景泰元年出視紫荆倒馬白  
羊諸關隘與都指揮同知翁信督修雁門關其秋遂以  
本官兼翰林學士入閣預機務尋改戶部侍郎兼職如  
故明年六月以天變條上三事一厚結朵顏赤斤諸衛

為東西藩籬一免京軍餘丁以資生業一禁訐告王振  
餘黨以免枉濫詔悉從之又明年二月改吏部仍兼學  
士是春京師久雨雪淵上言漢劉向曰凡雨陰也雪又  
雨之陰也仲春少陽用事而寒氣脅之占法謂人君刑  
法暴濫之象陛下恩威溥洽未嘗不赦過宥罪竊恐有  
司奉行無狀寬抑或有未伸且向者下明詔免景泰二  
年田租之三今復移檄追徵則是朝廷自失大信於民  
怨氣鬱結良由此也帝乃令法司申寬濫詰戶部違詔

下尚書金濂於獄卒免稅如詔東宮既易加太子少師  
四川巡撫僉都御史李匡不職以淵言罷之母憂起復  
初侍講學士倪謙遭喪淵薦謙為講官謙遂奪哀至是  
御史周文言淵引謙正自為今日地帝以事既處分不  
問而令自今羣臣遭喪無濫保五年春山東河南江北  
饑命同平江侯陳豫往撫淵前後條上軍民便宜十數  
事并請築淮安月城以護常盈倉廣徐州東城以護廣  
運倉悉議行時江北洊饑淮安糧運在塗者淵悉追還

備振漕卒乘機侵耗事聞遣御史按實淵被劾當削籍  
廷臣以淵守便宜不當罪帝宥之閣臣既不相協而陳  
循王文尤刻私淵好議論每為同官所抑意忽忽不樂  
會兵部尚書于謙以病在告詔推一人協理部事淵心  
欲得之循等佯推淵而密令商輅草奏示以石兵江工  
四字淵在旁不知也此詔下調工部尚書石璞於兵部  
而以淵代璞淵大失望英宗復位與陳循等俱謫戍遼  
東未幾卒初黃珌之奏易儲也或疑淵主之邱濬曰此

易辨也廣西紙與京師紙異索奏視之果廣西紙其誣乃白成化初復官

許彬字道中寧陽人永樂十三年進士改庶吉士授檢討正統末累遷太常少卿兼翰林待詔提督四夷館上皇還遣彬至宣府奉迎上皇命罪已詔及諭羣臣

敕遣祭土木陣亡官軍以此受知上皇還擢本寺卿石亨等謀復上皇以其謀告彬彬進徐有貞語具有貞傳英宗復位進禮部左侍郎兼翰林院學士入直文淵閣



未幾為石亨所忌出為南京禮部右侍郎甫行貶陝西  
參政至則乞休去憲宗立命以待郎致仕尋卒彬性坦  
率好交游不能擇人一時浮蕩士多出其門晚參大政  
方欲杜門謝客而客惡其變態競相騰謗竟不安其位  
陳文字安簡廬陵人鄉試第一正統元年進士及第授  
編修十二年命進學東閣秩滿遷侍講景泰二年閣臣  
高穀薦文才遂擢雲南右布政使貴州比歲用兵資餉  
雲南民困轉輸文令商賈代輸而民倍償其費皆稱便

稅課額鈔七十餘萬吏俸所取給典者侵蝕吏或累歲不得俸文悉按治課日羨溢雲南產銀民間用銀貿易視內地三倍隸在官者免役納銀亦三之納者不為病文曰雖如是得無傷廉乎損之復令減隸額三之一名譽日起遷廣東左布政使母憂未赴英宗既復位一日謂左右曰向侍朕編修摺而長者安在左右以文對即召為詹事乞終制不允入侍東宮講讀學士呂原卒帝問李賢誰可代者曰柯潛可出告王翱翱曰陳文以次

當及奈何抑之明日賢入見如翱言七年二月進禮部  
右侍郎兼學士入內閣文既入數撓賢以自異曰吾非  
若所薦也侍讀學士錢溥與文比舍居交甚歡溥嘗授  
內侍書其徒多貴幸來謁必邀文共飲英宗大漸東宮  
內侍王綸私詣溥計事不召文文密覘之綸言帝不豫  
東宮納妃如何溥謂當奉遺詔行事已而英宗崩賢當  
草詔文起奪其筆曰無庸已有草者因言綸溥定計欲  
逐賢以溥代之而以兵部侍郎韓雍代尚書馬昂賢怒

發其事是時憲宗初立綸自謂當得司禮氣張甚英宗大殮綸衰服襲貂帝見而惡之太監牛玉恐其軋已因數綸罪逐之去溥謫知順德縣雍浙江參政詞所連順天府尹王福通政參議趙昂南寧伯毛榮都督馬良馮宗劉聚錦衣都指揮僉事門達等皆坐謫雍亦文素所不悅者也改吏部左侍郎同知經筵事成化元年進禮部尚書羅倫論賢奪情文內媿陰助賢逐倫益為時論所鄙三年春帝命戶部尚書馬昂副都御史林聰及給

事中潘禮陳越清理京營文奏必得內臣共事始可剋除宿弊因薦太監懷恩帝從之英宗實錄成加太子少保兼文淵閣大學士四年卒贈少傅謚莊靖文素以才自許在外頗著績效士大夫多冀其進用及居宮端行事鄙猥既參大政無所建明朝退則引賓客故人置酒為曲宴專務請屬性卞急遇睚眦怨必報及賢卒文益恣意行名節大喪歿後禮部主事陸淵之御史謝文祥皆疏論文不當得美謚帝以事已施行不許

萬安字循吉眉州人長身魁顏眉目如刻畫外寬而深  
中正統十三年進士改庶吉士授編修成化初屢遷禮  
部左侍郎五年命兼翰林學士入內閣參機務同年生  
詹事李泰中官永昌養子也齒少於安安兄事之得其  
驩自為同官每當遷必推安出已上至是議簡閣臣泰  
復推安曰子先之我不患不至故安得入閣而泰忽暴  
病死安無學術既柄用惟日事請託結諸閹為內援時  
萬貴妃寵冠後宮安因內侍致殷勤自稱子姪行妃嘗

自媿無門閥聞則大喜妃弟錦衣指揮通遂以族屬數  
過安家其妻王氏有母至自博興王謂母曰嚮家貧時  
以妹為人婢今安在母曰第憶為四川萬編修者通心  
疑是安訪之則安小婦由是兩家婦日往來通妻著籍  
禁內恣出入安得備知宮中動靜益自固侍郎邢讓祭  
酒陳鑑與安同年不相能安構獄除兩人名七年冬彗  
見天田犯太微廷臣多言君臣否隔宜時召大臣議政  
大學士彭時商輅力請司禮中官乃約以御殿日召對

且曰初見情未洽勿多言姑俟他日將入復約如初比見時言天變可畏帝曰已知卿等宜盡心時又言昨御史有疏請減京官俸薪武臣不免觖望乞如舊便帝可之安遂頓首呼萬歲欲出時輅不得已皆叩頭退中官戲朝士曰若輩嘗言不召見及見止知呼萬歲耳一時傳笑謂之萬歲閣老帝自是不復召見大臣矣其後尹直入閣欲請見帝計事安止之曰往彭公請召對一語不合輒叩頭呼萬歲以此貽笑今吾輩每事盡言太監



擇而聞之上無不允者勝面對多矣其容悅不識大體  
且善歸過於人如此九年進禮部尚書久之改戶部十  
三年加太子少保俄改文淵閣大學士孝宗出閣進吏  
部尚書謹身殿大學士尋加太子太保時彭時已歿商  
輅以忤汪直去在內閣者劉珝劉吉而安為首輔與南  
人相黨附珝與尚書尹旻王越又以北人為黨互相傾  
軋然珝疏淺而安深鷙故珝卒不能勝安十八年汪直  
寵衰言官請罷西廠帝不許安具疏再言之報可中外

頗以是稱安文華大訓成進太子太傅華蓋殿大學士  
復進少傅太子太師再進少師當是時朝多秕政四方  
災傷日告帝崇信道敕封金闕玉闕真君為上帝遣安  
祭於靈濟宮而李孜省鄧常恩方進用安因彭華潛與  
結藉以排異已於是珥及王恕馬文升秦紘耿裕諸大  
臣相繼被逐而華遂由詹事遷吏部侍郎入內閣朝臣  
無敢與安抵牾者華安福人大學士時之族弟舉景泰  
五年會試第一深刻多計數善陰伺人短與安孜省比

嘗嗾蕭彥莊攻李秉又逐尹旻羅璟人皆惡而畏之踰  
年得風疾去孝宗嗣位安草登極詔書禁言官假風聞  
挾私中外譁然御史楊鵬詣閣安從容言曰此裏面意  
也鵬卽以其語奏聞謂安抑塞言路歸過於君無人臣  
禮於是庶吉士鄒智御史文貴姜洪等交章列其罪狀  
先是歛人倪進賢者粗知書無行諂事安日與講房中  
術安暱之因令就試得進士授為庶吉士除御史帝一  
日於宮中得疏一小篋則皆論房中術者未署曰臣安

進帝命太監懷恩持至閤曰此大臣所為耶安媿汗伏地不能出聲及諸臣彈章入復令恩就安讀之安數跪起求哀無去意思直前摘其牙牌曰可出矣始惶遽索馬歸第乞休去時年已七十餘尚於道上望三台星冀復用居一年卒贈太師謚文康初孝穆皇太后之薨內庭籍籍指萬貴妃孝宗立魚臺縣丞徐頊上書發其事廷臣議逮鞠萬氏戚屬曾出入宮掖者安驚懼不知所為曰我久不與萬氏往來矣而劉吉先與萬氏姻亦自

危其黨尹直尚在閣共擬旨寢之孝宗仁厚亦置不問  
安吉得無事安在政府二十年每遇試必令其門生為  
考官子孫甥壻多登第者子翼南京禮部侍郎孫弘璧  
翰林編修安死無幾翼弘璧相繼死安竟無後

劉珣字叔溫壽光人正統十三年進士改庶吉士授編  
修天順中歷右中允侍講東宮憲宗即位以舊宮僚屢  
遷太常卿兼侍讀學士直經筵日講成化十年進吏部  
左侍郎充講官如故珣每進講反覆開導詞氣侃侃聞

者為棟學士劉定之稱為講官第一憲宗亦愛重之明年詔以本官兼翰林學士入閣預機務帝每呼東劉先生賜印章一文曰嘉猷贊珣尋進吏部尚書再加太子少保文淵閣大學士文華大訓成加太子太保進謹身殿大學士珣性疎直自以宮寮舊臣遇事無所回護員外郎林俊以劾梁芳繼曉下獄珣於帝前解之李孜省輩左道亂政欲動搖東宮珣密疏諫謀少阻素薄萬安嘗斥安負國無恥安積忿日夜思中珣初商輅之劾汪

直也珣與萬安劉吉助之爭得罷西殿他日珣又折王  
越於朝越慚而退已而西殿復設珣不能有所諍至十  
八年安見直寵衰揣知西殿當罷邀珣同奏珣辭不與  
安遂獨奏疏上帝頗訝無珣名安陰使人訐珣與直有  
連會珣子鎡邀妓狎飲里人趙賓戲為劉公子曲或增  
飾穢語雜教坊院本奏之帝大怒決意去珣遣中官覃  
昌召安吉赴西角門出帝手封書一函示之安等佯驚  
救次日珣具疏乞休令駢驛賜月廩歲隸白金楮幣甚

厚其實排珥使去者安吉兩人謀也時內閣三人安貧  
狡吉陰刻珥稍優顧喜譚論人目為狂躁珥既倉卒引  
退而彭華尹直相繼入內閣安吉之黨乃益固珥初遭  
母憂廬墓三年比歸侍父盡孝父歿復廬於墓弘治三  
年卒謚文和嘉靖初以言官請賜祠額曰昭賢仍遣官  
祭之子銳字汝中八歲時憲宗召見愛其聰敏且拜起  
如禮即命為中書舍人宮殿門闕高同官楊一清常提  
之出入帝慮牙牌易損命易以銀厯官五十餘年嘉靖



中至太常卿兼五經博士仍供事內閣誥敕房博學有行誼與長洲劉棨並淹貫故實時稱二劉

劉吉字祐之博野人正統十三年進士改庶吉士授編修充經筵官寰宇通志成進修撰天順四年侍講讀於東宮以憂歸憲宗即位召纂英宗實錄至京上疏乞終制不允進侍讀實錄成遷侍讀學士直經筵累遷禮部左侍郎成化十一年與劉珝同受命兼翰林學士入閣預機務尋進禮部尚書孝宗出閣加太子少保兼文淵

閣大學士十八年遭父喪詔起復吉三疏懇辭而陰屬貴戚萬喜為之地得不允文華大訓成加太子太保進武英殿大學士久之進戶部尚書謹身殿大學士尋加少保兼太子太傅孝宗即位庶吉士鄒智御史姜洪力詆萬安尹直及吉皆小人當斥吉深銜之安直皆去吉獨留委寄愈專慮言者攻不已乃建議起遷科道官處以不次之位超起廢滯給事中賀欽御史強珍輩十人已次第擬擢吉復上疏薦之部曹預薦者惟林俊一人

冀以此籠絡言路而言者猶未息庶子張昇御史曹璘  
歐陽旦南京給事中方向御史陳嵩等相繼劾吉吉憤  
甚中昇逐之數興大獄智向囚繫遠貶洪亦謫官復與  
中官蔣琮比逐南御史姜綰等臺署為空中外側目言  
者亦少袁初吉與萬安劉珝在成化時帝失德無所規  
正時有紙糊三閭老泥塑六尚書之謠至是見孝宗仁  
明同列徐溥劉健皆正人而吉於閣臣居首兩人有論  
建吉亦署名復時時為正論竊美名以自蓋弘治二年

二月旱帝令儒臣撰文禱雨吉等言邇者奸徒襲李孜  
省鄧常恩故術見月宿在畢天將陰雨遂奏請祈禱覬  
一驗以希進用倖門一開爭言祈禱要寵召禍實基於  
此祝文不敢奉詔帝意悟遂已之五月以災異請帝修  
德防微慎終如始八月又以災異陳七事代王獻海青  
吉等言登極詔書已却四方貢獻乞勿受明年三月偕  
同列上言陛下聖質清羸與先帝不同凡宴樂游觀一  
切嗜好之事宜悉減省左右近臣有請如先帝故事者

當以太祖太宗典故斥退之祖宗令節宴游皆有時陛下法祖宗可也吐魯番使者貢獅子還帝令內閣草敕遣中官送之吉等言不宜優寵太過使番戎輕中國事遂寢既又言獅子諸獸日飼二羊歲當用七百二十又守視校尉日五十人皆繁費宜絕諸獸食聽自斃帝不能行十二月星變又言邇者妖星出天津歷杓白迫營室其占為兵為饑為水旱今兩畿河南山西陝西旱蝗四川湖廣歲不登倘明年復然恐盜賊竊發禍亂將作

顧陛下節用度罷宴游屏讒言斥異教留懷經史講求  
治道沙河修橋江西造瓷器南海子繕垣牆俱非急務  
宜悉停止帝嘉納之帝惑近習言頗崇祈禱事發經牌  
令閣臣作贊又令擬神將封號吉等極言邪說當斥吉  
自帝初即位進少傅兼太子太師吏部尚書及憲宗實  
錄成又進少師華蓋殿大學士吉柄政久權勢烜赫帝  
初傾心聽信後眷頗衰而吉終無去志五年帝欲封后  
弟伯爵命吉撰誥券言言必盡封二太后家子弟方可

帝不悅遣中官至其家諷令致仕始上章引退詔賜敕  
馳驛如故事吉多智數善附會自緣飾銳於營私時為  
言路所攻居內閣十八年人自之為劉縣花以其耐彈  
也吉疑其言出下第舉子因請舉人三試不第者不得  
復會試時適當會試期舉子已羣集都下禮部為請詔  
姑許入試後如今已而吉罷令亦不行吉歸踰年卒贈  
太師謚文穆

尹直字正言泰和人景泰五年進士改庶吉士授編修

成化初充經筵講官與修英宗實錄總裁欲革去景泰  
帝號引漢昌邑更始為此直辨曰實錄中有初為大臣  
後為軍民者方居官時則稱某官某既罷去而後改稱  
如漢府以謀逆降庶人其未反時書王書叔如故也豈  
有逆計其反而即降從庶人之號者哉且昌邑旋立旋  
廢景泰帝則為宗廟社稷主七年更始無所受命景泰  
帝則策命於母后當時定傾危難之中微帝則京師非  
國家有雖易儲失德然能不惑於盧忠徐振之言卒全



兩宮以至今日其功過足相準不宜去帝號時不能難  
既成進侍讀歷侍讀學士六年上疏乞纂修大明通典  
并續成宋元綱目章下所司十一年遷禮部右侍郎辭  
不許丁父憂服除起南京吏部右侍郎就改禮部左侍  
郎二十二年春召佐兵部占城王古來為安南所逼棄  
國來求援議者欲送之還直曰彼窮來歸我若驅使還  
國是殺之也宜遣大臣即詢量宜處置詔從之命都御  
史屠浦往貴州鎮巡官秦苗反請發兵廷議將從之直

言起釁邀功不可信命官往勸果無警是年九月改戶部兼翰林學士入內閣踰月進兵部尚書加太子太保直明敏博學練習朝章而躁於進取性矜忌不自檢飭與吏部尚書尹旻相惡直初覲禮部侍郎而旻薦他人直以中旨得之次日遇旻於朝舉笏謝旻曰公所謂簡在帝心者自是怨益深後在南部八年鬱鬱不得志屬其黨萬安彭華謀內召旻輒持不可諸朝臣亦皆畏直幸其在南及推兵部左右侍郎吏部列何琮等八人詔

用琮而直以安華及李孜省力中旨召還至是修怨與  
孜省等比陷旻父子得罪又構罷江西巡撫閔珪物論  
喧然不平刑部郎袁清者安私人又幸於內侍郭閔勘  
事浙江輟轡諸大吏吏部尚書李裕惡之比還即除紹  
興知府清懼累章求改裕極論其罪下詔獄安閔以屬  
直為言於孜省取中旨赦之改知鄖陽孝宗立進士李  
文祥御史湯萬姜洪繆樗庶吉士鄒智等連章劾直給  
事中宋琮及御史許斌言直自初為侍郎以至入閣賣

緣攀附皆取中旨帝於是薄其為人令致仕弘治九年  
表賀萬壽并以太子年當出閣上承華箴引先朝少保  
黃淮事冀召對帝却之正德中卒謚文和

贊曰易稱內君子外小人為泰外君子內小人為否況  
端揆之寄百寮具瞻者乎陳循以下諸人雖不為大奸  
惡而居心刻忮務逞己私同己者比異己者忌比則相  
援忌則相軋至萬安劉吉要結近倖蒙恥固位猶幸同  
列多賢相與彌縫匡救而穢跡昭彰小人之歸何可掩

哉

明史卷一百六十八

欽定四庫全書

明史卷一百六十八考證

陳循傳宣德初受命直南宮日承顧問賜第玉河橋

臣黃壽齡按獻徵錄及識大錄循授修撰時即賜第萬寶坊至是又賜第玉河橋也史畧之謹識

王文傳文之死人皆知其誣以素刻忤且迎駕復儲之議不愜輿論故冤死而民不思

臣黃壽齡按識大

錄及獻徵錄石亨等以公在都察院時曾劾之乘機

報復設計誣陷而死四方冤之年六十有五史畧之  
謹識

江淵傳英宗復位與陳循等俱謫戍遼東

臣黃壽齡

按謫戍遼東史言與陳循等俱謫殆亦為石亨輩所  
劾耶且識大錄及獻徵錄亦有後石亨敗復其官之  
語謹附識

萬安傳同年生詹事李泰中官永昌養子也齒少於安  
安兄事之

臣黃壽齡按獻徵錄泰齒少於安十二



歲謹識

尹直傳成化初充經筵講官與修英宗實錄總裁欲草  
去景泰帝號臣黃壽齡按總裁欲草去景泰帝號  
事史未詳載其創議今據憲宗本紀載有左庶子黎  
淳疏駁事而雷禮列卿紀又載淳於成化初嘗預修  
英宗實錄是此議出自淳意亦未可知謹附考

明史卷一百六十八考證

欽定四庫全書

明史卷一百六十九

大學士張廷玉等奉 敕修

列傳第五十七

高 穀

胡 濬

王 直

高穀字世用揚州興化人永樂十三年進士選庶吉士授中書舍人仁宗即位改春坊司直郎尋遷翰林侍講

英宗即位開經筵楊士奇薦穀及苗衷馬翰曹鼎四人侍講讀正統十年由侍講學士進工部右侍郎入內閣典機務景泰初進尚書兼翰林學士掌閣務如故英宗將還奉迎禮薄千戶龔遂榮投書於穀且言禮宜從厚援唐肅宗迎上皇故事穀袖之入朝徧示廷臣曰武夫尚知禮況儒臣乎衆善其言胡濬王直欲以聞穀曰迎復議上上意久不決若進此書使上知朝野同心亦一助也都御史王丈不可已而言官奏之詰所從得穀對

曰自臣所因抗章懇請如遂榮言帝雖不從亦不之罪  
二年進少保東閣大學士易儲加太子太傅給二俸應  
天鳳陽災命祀三陵振貧民七年進謹身殿大學士仍  
兼東閣內閣七人言論多齟齬穀清直持議正王文由  
穀薦數擠穀穀屢請解機務不許都給事中林聰忤權  
要論死穀力救得薄譴陳循及文構考官劉儼黃諫帝  
命禮部會穀覆閱試卷穀力言儼等無私且曰貴冑與  
寒士競進已不可況不安義命欲因此構考官乎帝乃

賜循文子中式惟黜林挺一人事得已英宗復位循文等皆誅竄穀謝病英宗謂穀長者諸廷臣曰穀在內閣議迎駕及南內事嘗左右朕其賜金帛襲衣給驛舟以歸尋復賜敕獎諭穀既去位杜門絕賓客有問景泰天順間事輒不應天順四年正月卒年七十穀美丰儀樂儉素位至台司敝廬瘠田而已成化初贈太保謚文義胡濙字源潔武進人生而髮白彌月乃黑建文二年舉進士授兵科給事中永樂元年遷戶科都給事中惠帝

之崩於火或言遜去諸舊臣多從者帝疑之五年遣滌  
頌御製諸書并訪仙人張邈遇徧行天下州郡鄉邑隱  
察建文帝安在濊以故在外最久至十四年乃還所至  
亦間以民隱聞母喪乞歸不許擢禮部左侍郎十七年  
復出巡江浙湖湘諸府二十一年還朝馳謁帝于宣府  
帝已就寢聞濊至急起召入濊悉以所聞對漏下四鼓  
乃出先濊未至傳言建文帝蹈海去帝分遣內臣鄭和  
數輩浮海下西洋至是疑始釋皇太子監國南京漢王

為飛語謗太子帝改濫官南京因命廉之濫至密疏馳  
上監國七事言誠敬孝謹無他帝悅仁宗即位召為行  
在禮部侍郎濫陳十事力言建都北京非便請還南都  
省南北轉運供億之煩帝皆嘉納既聞其嘗有密疏疑  
之不果召轉太子賓客兼南京國子祭酒宣宗即位仍  
遷禮部左侍郎明年來朝乃留行在禮部尋進尚書漢  
王反與楊榮等贊親征事平賚予甚厚明年賜第長安  
右門外給閭者二人賜銀章四生辰賜宴其第四年命



兼理詹事府事六年張本卒又兼領行在戶部時國用漸廣濬慮度支不足蠲租詔下輒沮格帝嘗切戒之然眷遇不少替嘗曲宴濬及楊士奇夏原吉蹇義曰海內無虞卿等四人力也英宗即位詔節冗費濬因奏減上供物及汰法王以下番僧四五百人浮費大省正統五年山西災詔行寬卹既有採買物料之命濬上疏言詔旨宜信又言軍旗營求差遣因而擾民宜罷之皆報可行在禮部印失詔弗問命改鑄已又失被劾下獄未

幾印獲復職九年年七十乞致仕不許英宗北狩羣臣聚哭于朝有議南遷者渼曰文皇定陵寢于此示子孫以不拔之計也與侍郎于謙合中外始有固志景帝即位進太子太傅楊善使額森渼言上皇蒙塵久宜附進服食不報上皇將還命禮部具奉迎儀渼等議遣禮部迎於龍虎臺錦衣具法駕迎居庸關百司迎土城外諸將迎教場門上皇自安定門入進東安門于東上北門南面坐皇帝謁見畢百官朝見上皇入南城大內議上

傳旨以一轎二馬迎於居庸關至安定門易法駕餘如  
奏給事中劉福等言禮太薄帝報曰朕尊大兄為太上  
皇帝尊禮無加矣福等顧云太薄其意何居禮部其會  
官詳察之濛等言諸臣意無他欲陛下篤親親耳帝曰  
昨得太上皇書具言迎駕之禮宜從簡損朕豈得違之  
羣臣乃不敢言會千戶龔遂為書投大學士高穀穀言  
奉迎宜厚具言唐肅宗迎上皇故事穀袖之以朝與王  
直等共觀之直與濛欲聞之帝為都御史王文所阻而

給事中葉盛竟以聞盛同官林聰復劾直濬穀等皆股肱大臣有聞必告不宜偶語竊議有詔索書濬等因以書進且言肅宗迎上皇典禮今日正可做行陛下宜躬迎安定門外分遣大臣迎龍虎臺帝不悅曰第從朕命無事紛更上皇至居南城宮濬請帝明年正旦率羣臣朝廷安門不許上皇萬壽節請令百官拜賀延安門亦不許三年正月與王直並進少傅易太子加兼太子太師王文惡林聰文致其罪欲殺之濬不肯署遂稱疾數

日不朝帝使興安問疾對曰老臣本無疾聞欲殺林聰殊驚悸耳聰由是得釋英宗復位力疾入朝遂求去賜璽書白金楮幣襲衣給驛官其一子錦衣世鎮撫濬厯事六朝垂六十年中外稱耆德及歸有三弟年皆七十餘鬚眉皓白燕聚一堂因名之曰壽愷又七年始卒年八十九贈太保謚忠安濬節儉寬厚喜怒不形於色能以身下人在禮部久表賀祥瑞以官當首署名因人謂其性善承迎南城人龔謙多妖術濬薦為天文生又薦

道士仰彌高曉陰陽兵法使守邊時頗議之

王直字行儉泰和人父伯貞洪武十五年以明經聘至京時應詔者五百餘人伯貞對第一授試僉事分巡廣東雷州復呂塘廢渠清鹽法會罷分巡官召還為戶部主事以父喪服闋不時起謫居安慶建文初復以薦知瓊州崖州黎相仇殺以反聞且用兵伯貞捕其首惡兵遂罷瓊田歲常三獲以賦軍軍不時受俟民乏乃急斂以要利伯貞為立期三輸之弊始絕居數年大治流民

占籍者萬餘憂歸卒於家直幼而端重家貧力學舉永樂二年進士改庶吉士與曾榮王英等二十八人同讀書文淵閣帝善其文召入內閣俾屬草尋授修撰歷事仁宗宣宗累遷少詹事兼侍讀學士正統三年宣宗實錄成進禮部侍郎學士如故五年出莅郎事尚書胡濙悉以部政付之直處之若素習者八年正月代郭進為吏部尚書十一年戶部侍郎奈亨附王振構郎中趙敏詞連直及侍郎曹義趙新並下獄三法司廷鞫論亨斬

直等贖徒帝宥直義奪亨新俸帝將親征額森直率廷臣力諫曰國家備邊最為謹嚴謀臣猛將堅甲利兵隨處充滿且耕且守是以久安今敵肆猖獗違天悖理陛下但宜固封疆申號令堅壁清野蓄稅以待之可圖必勝不可親御六師遠臨塞下況秋暑未退旱氣未回青草不豐水泉猶寒士馬之用未充兵凶戰危臣等以為不可帝不從命直留守王師覆於土木大臣羣請太后立皇子為皇太子命郕王攝政已勸王即位以安反側



時變起倉卒朝臣議屢上皆直為首而直自以不如于  
謙每事推下之雍容鎮率而已加太子太保景泰元年  
頗森使議和且請還上皇下禮部議未決直乃率羣臣  
上言曰太上皇惑細人言輕身一出至於蒙塵陛下宵  
衣旰食徵天下兵與羣臣百姓同心僇力期滅此朝食  
以雪不共戴天之耻迺者天誘其衷頗森有悔心之萌  
而來求成於我請還乘輿此轉禍為福之機也望陛下  
俯從其請遣使往報因察其誠偽而撫納之奉太上皇

以歸少慰祖宗之心陛下天位已定太上皇還不復泣  
天下事陛下第崇奉之則天倫厚而天眷益隆誠古今  
盛事也帝曰卿等言良然但前後使者五輩往終不得  
要領今復遣使設彼假送駕為名來犯京師豈不為蒼  
生患賊詐難信其更議之尋衛拉特別部阿拉使復至  
胡濬等復以為言於是帝御文華殿門召諸大臣及言  
官諭以宜絕狀直對曰必遣使毋貽後悔帝不悅于謙  
前為解帝意釋羣臣既退太監興安趨出呼曰若等固

欲遣使有文天祥富弼其人乎直大言曰廷臣惟天子  
使既食其祿敢辭難乎言之再聲色愈厲安語塞乃議  
遣使命李實羅綺往既行而衛拉特汗托克托布哈及  
額森使先後至將遣歸使者謂館伴曰中國關外十四  
城皆為我有前阿拉知院使來尚遣入偕往今亦必得  
大臣同行庶有濟胡濤以聞下廷議直等固請乃遣楊  
善等報之比實還又以額森使至具言額森欲和狀直  
與寧陽侯陳懋等上疏請更遣使齎禮幣往迎上皇不

許復上疏曰臣等與李實語具得彼中情事其所需衣物資斧者上皇言也而奉迎車駕願森意也昨托克托布哈及阿拉知院使來皆有報使今額森使以迎請為辭乃不遣使與偕是疑敵而召兵也又不許已而實自言於帝帝第報額森書就令楊善迎歸而已直等復上言今北使已發願本上皇之心順臣民之願因彼悔心遣使往報以圖迎復此不待計而決者也不然衆志難犯違天不祥彼將執為兵端邊事益棘京師亦不得

高枕卧矣帝乃命羣臣擇使直與陳懋等請仍遣實報  
曰候善歸議之御史畢鑾等復上疏力言就令彼以詐  
來我以誠往萬一不測則我之兵力固在帝終不聽已  
而善竟奉上皇還二年額森使入貢且請答使直屢疏  
言邊備未修芻糧未足瘡痍未復宜如其請遣使往以  
觀虛實開導其善不許無何額森遣騎入塞以報使為  
辭直與羣臣復請之卒不許直等乃上疏言陛下銳意  
治兵為戰守計真大有為之主然使命不通難保其不

為寇宜敕沿邊守臣發兵遊徼有警則入保無事則力耕陛下於機務之暇時召京營總督總兵詢以方畧誠接而禮貌之信賞罰以持其後斯戰守可言也帝曰善明年正月進少傳帝欲易太子未發會思明土知府黃玠以為請帝喜下禮部議胡濙唯唯文武諸臣議者九十一人當署名直有難色陳循濡筆強之乃署竟易皇太子直進兼太子太師賜金帛加等頓足歎曰此何等大事乃為一縷首所壞吾輩愧死矣景帝疾亟直濬等

會諸大臣臺諫請復立沂王為皇太子推大學士商輅  
草疏未上而石亨徐有貞等奪門迎上皇復位殺王文  
等疏草留姚夔所嘗出以示郎中陸昶數曰是疏不及  
進天也直遂乞休賜璽書金綺楮幣給驛歸直為人方  
面修髯儀觀甚偉性嚴重不苟言笑及與人交恂恂如  
也在翰林二十餘年稽古代言編纂紀注之事多出其  
手與金谿王英齊名人稱二王以居地目直曰東王英  
曰西王直以次當入閣楊士奇不欲也及長吏部益廉

慎時初罷廷臣薦舉方面大吏專屬吏部直委任曹郎  
嚴抑奔競凡御史巡方歸者必令具所屬賢否以備選  
擢稱得人其子積為南國子博士考績至部文選郎欲  
留侍直直不可曰是亂法自我始也朝廷以直老命何  
文淵為尚書佐之文淵去又命王翱部遂有二尚書直  
為尚書十四年年益高名德日益重帝優禮之免其常  
朝比家居嘗從諸佃僕耕蒔擊鼓歌唱諸子孫更迭舉  
觴上壽直歎曰曩者西楊抑我今不得共事然使我在



閣令上復辟當不免遼陽之行安得與汝曹為樂哉天  
順六年卒年八十四贈太保諡文端積仕至翰林檢討  
亦以學行稱曾孫思自有傳

贊曰高穀之清直胡濬之寬厚王直之端重蓋皆有大  
臣之度焉當英景之間國勢初更人心觀望執政任事  
之臣多阿意取容而穀惓惓於迎駕之儀直亦侃侃於  
遣使之請皆力持正議不隨衆俛仰故能身負碩望始  
終一節可謂老成人矣惟易儲之議三人者心知其非

而不免附和抑獨何歟

明史卷一百六十九

欽定四庫全書

明史卷一百六十九考證

高穀傳千戶龔遂榮投書於穀

臣章宗瀛按是時遂

榮獻書隱其名曰修史先生及給事中葉盛奏其書

景泰怒甚索上書人急龔遂榮遂自投首繫獄久之

始釋見識大錄與傳所載互異謹附考

高穀傳都給事中林聰忤權要論死

臣章宗瀛按林

聰嘗疏劾王文文怨之求其罪不得會聰屬鄉人於

吏部文選郎中阿文意出其手書欲置重法賴穀言得免死見王鏊守溪筆意傳所言權要蓋指王文也

謹考

高穀傳陳循及文構考官劉儼黃諫

臣章宗瀛按陳

循王文以其子入試不中因言解首徐經故賈人子儼等受其賂而以冠多士景泰為之增解額乃已見明王世貞別集傳未詳謹附考

胡濙傳遺濙頒御製諸書

臣章宗瀛按所頒御製諸

書乃性理大全為善陰陽孝順事實三種見明永樂  
實錄謹附考

胡濙傳官其一子錦衣世鎮撫 臣章宗瀛按濙子名  
長寧濙歸里後遣其詣闕申謝因授以官見明實錄  
謹附考

王直傳請復立沂王為皇太子推大學士商輅草疏未  
上 臣章宗瀛按明商輅撰姚夔墓志紀此事甚詳  
疏中有云陛下為宣宗之子當立宣宗之孫正位東

官夔又舉筆添一復字直濛等咸稱善時為景泰八年正月十六日至十七日而石亨等變作謹附考

後贊惟易儲之議三人者心知其非而不免附和抑獨何歟 臣章宗瀛按高穀胡濛王直皆負一時重望易儲之議不允於九十一人隨同署名較之李侃林聰等力爭者稍覺有愧擬改贊內始終一節二句云惟易儲之議三人者心知其非而不免附和抑獨何歟即以次行空白勾刻謹識